



KOMUNIKADO PA PRENSA

Fecha

3 mart 2016

EVALUASHON DI PÜNÈSNAN TA TUMANDO LUGÁ

RIBA PETISHON DI MINISTER CAMELIA-RÖMER

Willemstad – Manera ya ta konosí, dia 25 di febrüari último, Servisio pa Obra Públiko (mihó konosí komo OW) a kuminsá ku un proyekto nobo pa pone pünès di plèstik na altura di e rotònden na Kòrsou. E promé proyekto a keda ehekutá ta na altura di e rotònde na Julianadorp i durante e último dianan, e Ministerio di Tráfiko, Transporte i Planifikashon Urbano (mihó konosí komo VVRP), a risibí vários reakshon kritiko i positivo di komunidat. Mesora Minister sra. Suzy Camelia-Römer a pidi pa hasi un evaluashon riba e ehekushon dje proyekto di e pünèsnan pa asina e kambionan nesesario por tuma lugá.

E motibu ku a pone e pünèsnan ta pa evitá e tantísimo kasonan di daño na outo i mobilario di e kayanan di Kòrsou i alsa aun mas tantu e seguridat den tráfiko. E dañonan aki ta okashoná pa hende ku ta kore muchu duru drenta e rotònden. Hopi biaha OW tin ku drecha e dañonan ku outomobilistanan ta okashoná durante e oranan di anochi pasó na lugá di kore riba e asfalt, algun outomobilista ta kore riba e rònchi meimei di e rotònden.

Ehekushon di e promé proyekto di pünès a tuma lugá i no ta sin mas ta sigui ku e otro rotònden sin hasi un evaluashon riba ehekushon di e promé proyekto. A opta pa riba petishon di Minister Camelia-Römer, hasi un evaluashon ku ta enserá tur e reakshonnan ku e Ministerio a risibí di e pueblo (sea positivo òf kritiko). A base di e evaluashon lo skohe e kambionan ku ta bai trese den e ehekushon inisial sin ku e ta nifiká desperdisio di plaka di pueblo, pasó no ta e echo ku a pone e pünèsnan tin reakshon riba dje, pero mas bien e kantidat i manera ku a pone e pünèsnan. Ademá, OW tin ku investigá tambe kon bin den korto tempu asina, ya kaba algun di e pünèsnan ta kibrá. Ke men e resultado dje evaluashon tin ku mostra tambe si ta e kalidat dje produkto ta inferior òf ku ta vandalismo a tuma lugá.

Minister Camelia-Römer ke gradesí komunidat pa e reakshonnan ku e Ministerio a risibí i tambe pa e kompreshon nesesario pa e situashon ya ku awe, dia 3 di mart mes e evaluashon ta tuma lugá, pa asina mostra kiko e posibel kambionan lo bira. Na momento ku Minister regresá bèk for di Colombia, lo tuma un desishon riba e kambionan.